

皇清文穎續編

皇清文頌續編卷二十一

頌

平定金川頌

謹序

成親王永理

小金川悖叛金川助之以抗拒

王師於今五年

皇帝命將軍阿桂等以次討平之告成功於乾隆四

十一年二月四日

臣

永理謹作頌以獻以紀事

之所由始功之所由成而有以見

聖人之舉之出於不得已也西南夷爲患自古而然
矣其性貪頑而獠輕而又恃其險阻輒謂中國
不可以驟至是以蠶食弱小以肆其隱志無所
憚畏緩則相仇急則相親鎮之不靖訓之不從
臣聞王者有外內之分土無彼此之疆界有生
殺之大義無棄取之成心旣在我宇爲我民而
遂聽其傲很屠戮不能報虐以威者固我

皇帝之所不取也小金川者趨拉之土司也金川者

促浸之土司也當乾隆十三年促浸有罪興師
問而定之越十年其酋郎卡長惡不悛封豕長
蛇以爲九土司害九土司皆苦其毒然而無敢
棄禮中國中國固置弗問如是者九年郎卡乃
歸罪自服於督臣而女其子於趨拉土司之子
僧格桑自是兩金川相比而爲厲矣悖違約法
蔑視大吏如是者復六年乃議進討之策當此
之時夫豈無謂地不足耕人不足用者乎如以

地不足耕而勿取是利其地也以人不足用而勿取是貪其人也

皇帝順

天心討有罪無所欲焉不可赦者毋赦焉而已是故析羣言之疑叅經權之用三十六年九月

命溫福桂林分道討賊此事之所由始也旣而溫福自巴郎拉克資哩至布朗廓宗底木達執僧格桑之父澤旺桂林自約咱克札哇窩至達烏以

阿桂爲四川提督阿桂自古爾壘克僧格宗至
美諾遂平趨拉卽進討促浸山川浚阻雨雪不
息蜂蠆有毒不備不虞賊徒潛煽溫福失利三
十八年乃授阿桂定西將軍以豐昇額明亮副
之盡收復前所失地三十九年阿桂西路之師
戰輒得當薄攻諸碉寨以臨遜克爾宗而據日
則了口初小金旣破僧格桑遁依促浸及是蒙
諾木以其骨乞降不許而明亮南路之師駐於

絨布豐昇額亦駐軍宜喜未能徑進夫兵貴於速且貴於重

皇帝每以諭將軍等將軍等設偵通道出賊不意合分諸路而入而皆有得也四十年八月阿桂克勒烏圍促浸之隘也一夕摧木城石卡六十賊奪其氣叱離遁逃而歸我者日夕繼踵十二月克雍中喇嘛寺遂至噶喇依築圍以環之明亮取獨松河富德取馬爾邦皆以兵來會遏壅水

道圍之四旬索諾木益困蹙自計無所追二月
四日率其屬出見於將軍將軍乃露布獻捷
皇帝方謁

東陵十二日紅旗至臣竊惟師旅之事出於不得已
天必佑之

皇帝念兩金川之搆孽憫諸土司之及禍遲之以歲
年而惡稔矣不有霜雪無以凝庶物不有震雷
無以達風雨不有征討誅艾無以靖亂畧此善

良故頓膝去而嘉禾滋介胃舉而疆場寧外內之分也生殺之義也興師以來

皇帝曰三復籌策夜卽數問奏書奏書至未嘗不披衣起

身勤乎九重之上

心周乎萬里之外此豈欲於地五百里人三萬衆者哉藉使地大於五百民贏於三萬而無罪者又可用師乎然則師之舉措在罪之有無而不得

已之實章章明矣此功之所由成也

皇帝恭奉

皇太后幸山東告成

闕里命諸王大臣致祭

天地

宗社四月二十六日

鑾輿還至郊勞將軍阿桂振旅愷以入獻俘命勲既

還官敬上

皇太后徽號

詔四川全境師行五年百姓無乃勞苦施惠有差於

是諸典備舉

臣

永理觀盛德之形容願有言焉

頌曰

維

聖時武執競萬邦自我所覆莫不來庭孰有不臣以

千紀綱

一章

蜀之西南曰兩金川負固而匿以日以年

帝念苗民自絕于

天

二章

乃

命將軍咨汝阿桂吉林索倫健銳火器畀汝用之汝

實良帥

三章

凡軍所需悉出中府凡軍所經毋使民苦凡軍便宜

一以委汝

四章

阿桂董衆由西路入陟鄴批巢其勝甚速將軍奏成

賊首匍匐 五章

帝曰將軍知兵之道我師勤止曰歸孔好崇臺我我

于郊汝勞 六章

乃望

原寢松柏青青乃告

先師岱宗是登乃進

玉冊

孝道顯明 七章

自唐吐番竊攘伺窺至於今茲以其族來生熟之戶

是闢是治

八章

帝用師貞事合於

天撫我中州及我邊壤有不得已大功成焉

九章

瀛臺侍宴頌

謹序

宗室永璞

粵以歲逢柔兆支屆攝提序屬仲秋律中南呂
百昌時若萬寶告成我

皇上盥食宵衣匪伊朝夕膺圖受籙十有一年迺殷
法

祖之宏謨大沛展親之至誼

駕臨上苑

蹕駐瀛臺

特召王公宗室等百有餘人式燕永日合食咸懽普
隆施昭鉅典也時則金飈乍起玉露未晞桂萼
舒芳菊英吐秀翠巘丹林生色芙蓉綠水爲鄉
葱蒨千章映西山而嵐蔚齋淪一派環

北闕以烟浮月榭風廊逶迤架壑朱樓繡栱峯嶽
干霄演漾龍池恍天連夫星漢滌洞鳳沼如秋
泛於明河於是逕轉銀塘隄牽錦纜桂櫂凌清
波而競發蘭橈擁密藻以潛移彩翩翩翻下瑤

池之青鳥紫鱗潑刺躍靈沼之文魚螺青而岸
轉蒼岑虹駕則橋橫碧玉望去十洲三島不遠
人間竭來紺宇璇宮直如天上涵虛浴景淵雲
作賦以難工墜粉沉紅金碧繪圖而莫就爾乃
間花張幕蔭樹開筵授几以班列爵有序珍羞
和於翠釜豐饌具於大庖餅裹紅綾羹湘錦帶
六璉八簋分玉食以難名五齊三清貯上尊而
並設飫琳腴於饗宰不數侯鯖膾仙鯉於蓮池

寧誇丙穴百壺急送喝蓋參差三雅橫飛行杯
絡繹銀虬漸永玉漏頻催臣樂未央

天顏有喜一箋飛下九霄旭日方升七律吟成五色
卿雲並麗溯本原於同氣九族恩聯陋帶礪之
徵盟一堂誼篤崱詩緝頌捧來奎壁光中戛玉
敲金和向鳳凰闕下羣情旣洽

寵賚載頒綠字丹文發現函於冊府吳綾蜀錦陳瑤
筐於彤墀朱提分寶笥之藏紫氎煥豐貂之彩

尙復人懷嘉果袖握珍封華藕芳蓮壓錦韞而
錯落紅房絳帶迴玉勒以輪囷

帝澤如春

天章麗日豈徒蘭芳菊秀俊汾水之雄才釣魚賞花

傳雍熙之高會哉蓋將以嗣惇敘之懿軌繼行

葦之床聲也

臣

幸附銀潢叨榮玉牒公姓公族

蟠根邀一本之親俾熾俾臧旣醉上萬年之頌

頌曰

維

皇端拱朝明堂宵旰勵精夜未央庶績熙哉庶事康
兆民率育安耕桑蠲租賜復年豐穰

湛恩汪濊周八荒和氣遊兮祥風翔

翠華臨蒞省遐方梯山航海來享王咸五登三媿虞

唐

萬幾餘暇翰藻香龍飛鳳舞垂星芒如雲如日如珪
璋特稽舊典法

仁皇爰

幸瀛臺飛羽觴水源木本溯天潢子姓宗族紛濟隄
錦幄肆設瓊筵張飫玉饌兮濡天漿行葦徵歌昭

宸章旣醉酬恩叶笙簧何以錫之承筐筐天孫雲錦
機七襄珍果纍纍逾琳瑯入懷珠玉盈歸裝

天恩似海詎能量

微臣

芑蔭襲餘慶拜手稽首欽對

揚

帝庸作歌偕賡颺幸生

聖世覩庥祥雝雝儀鳳鳴高岡敢祝

萬壽期無疆綿綿地久與天長傳之典冊千秋光

詔賜天下全租頌

裴曰修

帝德廣運聖神文武如日月光照臨下土噓爲景風
灑爲甘雨牖民墳篋型物規矩

一章

帝治孔治亦式自古清問下民用軫疾苦在遠不忘
遐及縣宇子之撫之載喫載咻

二章

帝曰念哉羣萃野處爾耕爾穡以賦官府惜其脂膏
方將貲汝以裕以暇俾汝多貯

三章

乙丑六月河漢案戶

帝坐法宮玉漏刻五逢逢擊鼓

詔書來下曰十一年大赦正賦

四章

詔書始出天地清舉公卿大夫羣喜相顧須臾四馳

捷若飛羽懽響雷騰徧不可禦

五章

惟

聖有作萬物皆覩載聞

詔書若渴飲醺若油然雲霈沐嘉溥東西朔南衢歌

巷舞

六章

政在養民邦寧本固於書是陳

帝用作所保又保康上配堯禹協於天行繩武

聖祖 七章

天鑒

帝德眷命篤祐錫

帝萬年爲神人主報以屢豐四海壽富更千億春歲

霑大酺 八章

聖駕東巡頌

謹序

劉統勳

粵稽古后紹天闡緯撫安四極迺丕靈承於

昊穹之休用觀民省方葢蕤紛綸之迹畧可述也夫

沉奧浮清曠矣兩間販章土宇之厚惟聖者以

時周之游源泳沫芸芸咳姓惠鮮巡靖之望惟

聖者以時答之厯選列辟沂測涯涘欲以炳諸

典謨而冠德卓絕自我天覆孰儔

聖代者

皇帝秉濬哲之德承鳥奕之光天維地樞是張是握
則靜譬於辰居動法乎日運乾行左旋

帝出東巡不謀而合厥應孔彰矣抑又聞之萬物出
於震方種於夾鍾之宮練日展諏適會招搖所
擬是用見於孔佐賓於泰祇仁恩曷羨雨雲行
施德車所輾冒茆齊同弗后弗先下人是煦謂
天啟人基禮時爲大抑

祖武克繩

孝思所宏敷也發自邑京轅於魯國百神翕習以扶
道周於廓靈海嶰輶介邱之間杲采旁舒紫熏
上引震震耀耀剖元符合冥契滋液者滲漉輶
鞅者奮撝其德貺休徵莫由得而殫已遺謁歸
藏藏封四尺葱鬱之氣綿焉矧茲宮牆枚實豆
籩璫粲弁帶濟陰執事有恪非

列聖累致尊崇曷因躋此洪惟我

聖祖貽謨陶鑄三五孕育八九歲在甲子迺

瞻東邦外運渾元內霑豪芒自白麟素書蹶生鄴邑
以還坤簡重開乾苞再啟英聲蜚於瀛渤誕畧
升於壇場先聖後聖其揆一也

皇帝合萬國之驩心致

慈寧之尊養錫類無極句萌甲坼喙息跂行之屬罔
不暢遂生成大哉孝乎以孝繼

祖以孝宗聖舒盛德發榮號

謁款尼山紹至德要道之緒矣載考周官堯之鎮山

爲天帝孫人靈之府天官之宮昔管氏博稱八
十有九畧七而義三揭石礪金匱有不俾而
假素罔光度而遺章咸曰望秩勛勛叶五靈百
寶之祥踐勒功章尊之蹟不爲進越也豈挈神
歡而缺王儀哉然昔有虞氏勤怠岳瀆著於假
典封巒之旨靡言焉意者有報祀之經無侈號
之義歟

景命有赫賔延舊虔茲者崆峒具茨之轍移於嶽長

封高禪厚挹而弗居乃顯秩明禋盼饗烹蒿重
物始致懷柔智崇禮卑非天下至聖其孰能與
於此嘉薦芳矣告靈饗矣七萃連鑣九旂齊軌
徐鑾警節明鐘暢音屆乎厯下之區莅於華附
之麓仡仡蘋壙屏翰斯在固壤歌扶杖之侶所
希歆於瞻就者也

有穆睟容載修前式懿律嘉量金科玉條昔漢氏蒼
葦王制一二僅存自命大師司市問百年以降

鮮能括於哲謨綜夫徽猷有仁覈誼義缺如也
今

天子建中和之極巍蕩難名又際會治辨禮具之盛
一尉一候幅幘旣長賁哉太行之南迄於會稽
禹步所經咸仰首而喁慕後

后來斯以我人休維夏書青兗徐揚淮絡江輪息通
脈接苟不忘遠不遐遺者

六御雖勤烏可以已大澤滄至先被近光有嚙嚙

熙熙者爾於是三事岳牧之寮僉爾而進曰蓋
聞王者以四表爲官以億人爲族以侯甸男邦
爲闕闔以宅中時邁爲起居疇能亘茲唐哉皇
哉夫蕩蕩水歸愉愉民懷儼曩者五繇碩慮之
軌將緝萬嗣而綽永福抱蔭有哀展采錯事俾
襲舊六爲七曰大莫大曰長莫長臭馨香含甘
實摛之罔窮爲億世師此颺延忭野之倫唱聲
而同辭者也詠仁蹈德奮肆姁媮爰拜手稽首

而作頌曰

皇揆景緯左海岱宗罄天張宇盡地開封聖躔不湮
奕禩道同迺涉其里迺造其宮雲動都莊舒虹燦電
靈鬱神華如飛如翰載錫之光褒成利見大桷高甍
以登以薦言盛威儀黼黻周張函宮吐角汁羽申商
緼豫爲紛和黑髮黃兩楹有奭我署文章誕發瑤扁
咀英瀝液今孰陳筵曩何在壁爽曙羣蒙權衡遏迹
著訊琅琅

幾音奕奕

訓茲傳胄考析嗣荷窺洙渚仰嶧嵯峨勉旃封殖
相檜猶柯開榮廣陰灑澤揚波陋古東轅登封用詫
玉牒金緘稱尊弗謝

聖作同虞明明在下克配升中名山是藉居歆放恣
郁荔芬芳華翮振振猛簾趨趨云亭類從梁父賓將
敲金歛霽紉縵飛鵝肆覲有繹龍鱗鸞路葩璫俄風
緹帷卷霧砮隱嘉祥響奔景赴協氣橫流恩膏汜布

大矣

王觀闔闢參侔乃歌燕喜純嘏優優根茂實蕃均祉
方州弼基纘緒

世德作求爰採風謠

天子大聖逢吉丁辰孔繇先命既肅柴燔曷休不應
億萬斯年寰區仰鏡

平定金川頌

謹序

錢陳羣

皇帝十四年二月經畧大學士忠勇公臣

傅恒

既平

金川捷書奏聞羣臣稽首呼萬歲

上欲然曰非予之力乃

五后之德

文母之訓親詣

慈寧宮稱賀行慶典布告天下惟時廷臣咸作爲詩

歌以紀功德

臣

伏考典冊所載黃帝師涿鹿高

宗伐鬼方周文之於崇於密傳及孫子宣王薄
伐儼狁未有不戰而能成功者惟書稱有苗來
格乃在班師振旅之後後世言武功者未有倫
比今金川番酋恃險構釁阻閼聲教大學士忠
勇公恒祇受
廟畧師壓境斬偵謀嚴紀律申六事渠魁慙伏無所
逃罪俛首乞命

皇上恢湯網施堯仁憫其窮而求活命恒納降班師

苗至頑蠢罔識天地高厚爲能揣測

大聖人度量函育帡幪異類而革面革心傾巢穴以
奉命令戴上將如慈父母自推轂以迄成事未
逾七旬膚公克奏噫何其神也易曰信及豚魚
書曰惟德動天無遠弗届非夫聰明睿知神武
而不殺者其孰能與於斯蔡沈言舜之文德非
自禹班師而始敷苗之來格非以舞干羽而後
至我

皇上之推仁也以天自處卽沈所謂干羽之舞雍容
不迫是也番衆之歸仁也自動以天卽沈所謂
有苗之格適當其時是也以今視昔殆有同符
臣媿無文未能鋪揚駿烈垂於無窮恭繹古今
來感通之理天人相與之際風之自也微乎微
乎其信然矣謹拜手稽首而獻頌曰

猗與

帝文萬寓綏綏爾師爾君股肱惟諸畏威懷德徼外

其來廣漢之羌禿髮在唐種人狡狂

禿髮訛爲吐蕃金川其遺種也

金川憑陸鳥語獸居釁仇鄰墟

天討用申戎車駢駢往綏邊人後先委蛇齟齬老師
皇帝曰嘻匪恢我圖任彼負嵎而乃稽誅曰惟相恒
一德欽承鉞授壇登宴餞作歌益兵番番

廟算孔多出自桃關水行雪攀天射之山至師殲兇

賊心受攻推其叩籠

後漢書冉駹夷依山而居累石爲室又叩籠訛今彼土夷人呼

爲礪也隱阿嶽岑無峭無深回面改襟

皇帝好生曰納其誠相勲予旌爵汝桓圭載歌以晞
振振來歸曰惟上公實勇實忠神明其通賊舞且吹
迎我旌旆入穴出巢總戎糾糾居由切率是豪酋獻琛
而謳約誓旣嚴戴天心忭曰輝露霑二月捷聞西顧
歡忻寧民息軍凱入春韶龍旂展霄

皇帝受朝樂饗賞行中外鏗訇大清天聲告功上
陵優渥薦馨惟

祖

考靈始時金川服則舍旃

聖母命宣祇崇

徽音惟孝治心穆穆愔愔

天筆隆隆碑於辟廱厥光熊熊蜀民亦勞今耆嬉敖
旣載旣燾惟德惟刑遠人勸懲王道永凝泰來之詒
上下福綏鞏萬年基

平定金川頌

謹序

齊召南

皇帝神武平定金川中冬命將徂征孟春奏捷下

詔班師受其降而不殺也殷武商名頌克鬼方以三年周宣江漢常武之雅近在徐土淮南猶且揚
詡鏘張傳播千古況

皇帝豐功偉績如是赫赫明明可無歌詩追配於商

頌周雅

臣

愚不自揆倣古以爲此詩

赫矣

聖武纘我

列祖以篤其祐命將鞠旅自天而下叶討金川番鹵

宋入其阻莫我敢拒其逆是取其順斯撫不留不處

前歌後舞以寧疆圉以福我寰宇一章

蠶爾金川隸我蜀邊馬羌狗蠻窟於雪山雪山巘峘

維石巉巉接岷連岍有水蜿蜒羊腸屈蟠恃險而顛

乃番簇是兼乃爐地是覘乃凋樓是堅抗我戈鋌二章

皇帝曰咨芽枿勿斯將成柯枝闡外誰司天誅是稽

我庸治之以儆恬嬉

聖筭深奇勿疑勿遲與神爲謀

叶

曰往視師汝傳恒

宜將熊羆虎貔以揚

皇威

三章

維十有一月

皇帝齋戒廷授之鉞禁旅偈偈旌旗發發旣禡辭

闕如火之烈如水之活如矢離筈馳抵賊穴旬日而

達雷轟電掣何勅不折何險不拔

四章

大兵堂堂師律孔明叶鼓向前岡狐鼠敢當走喙且

僵誰謂山蔣蔣如趨康莊誰謂水湯湯如渡橋梁誰

謂礪可藏如隕土墻礪此披猖如炳太陽以消雪霜

五章

番乞降恐後相臣上奏且俘羣醜蕩彼林藪

皇德高厚曰予聞大道叶驅左驅右寧失飛走矧亦

童叟降安可勿受

詔書下趣酋縛面泥首率千百其耦泣奉牛酒

六章

奕奕膚功閱月之中宣示臣工卽酬爾庸歸錫彤弓
惟休兵重農偃革銷烽當春始融甘雨和風澤普萬
邦叶惟

皇威與

天同斯罔不恪恭惟

皇德與

天同斯罔不包容七章

聖武昭燦伊止戈是樂紹

祖宗神畧文德無勿格環海之博是疆是索是耕是

鑿吹豳飲蜡萬類咸若

臣

忝佐宗伯實司簡冊頌詩

有作庶繼桓酌垂示無斁

八章

聖駕南巡頌 謹序

朱珪

臣

聞天周七政璇璣運五帝之車地上八風銅
管協三王之律是以雞頭熊耳山有軒雲白馬
彤輿人迎堯日有嫫五玉肇成封濬之書神禹
四乘獨得江河之性厥後中時而出展義而巡
黃魚天乙之壇白澤岐陽之鼓尙矣欽惟

皇帝陛下得統函三臨民以五大圖大矩兩珪發日
月之英乘馬乘龍四極體乾坤之撰觀光

九廟玉瓚如盈問寢

兩宮金鈴獨朗庶徵省歲通八蜡於虎貓一墖稽田
正三農於鳩扈洗兵金窟張井絡而天恢飲馬
火敦問河源而地闢羲和二伯更名海外之星
宮角五龍分掌崑山之部月氏候呂青雲來神
鳥之香天老觀河翠水得游鱸之篆於是山高
長白賦龍虬於東京臺雨清涼散蓮葩於西嶺
靈蛇抱璧舜石猶飛元露吹簫軒權自鎮二千

餘歲天文垂赤爵之書七十二家海日上金雞
之觀所以熙熙萬物傾登鳳於春臺嘒嘒羣生
聽鏘鸞於秋駕况乎衡殷南斗

聖祖之所六巡歲在重光我

皇於焉一豫先甲後甲七日而見

天心兗州揚州一夫不遺

堯澤

皇帝猶以火耕水耨重奪農祥木北金南勤思星好

截雲帆於澤國候雁無聲發露積於神倉蹲鴟
不用雨暘時若民無冬夏之咨牝牡歲成

帝有春秋之省時則四維天目環太一於中宮七曜
皇階轉搖光於正月龍頭豹尾雲飛開玉葉之
芝鳳舞鸞歌曰出御

金根之輦條風析木拂八羽於青陽麗澤天街潤三
辰於黃道山分齊魯

六龍蹕蒼帝之孫襲錯東南五鳳問金天之祖是則

湛露漑乎海岱仁風翔乎江淮矣

皇帝乃禪白馬於靈源詔黃龍於德水庚神鏢靜貫
清瀆之交流亥旣珠明鎮璇淵之九折金隄遠
覽桃花舒絳水之瀾

黃屋周諏蘭采動榮光之景洪湖濬迤度竹箭而無
波石堰連蜺捍蛟鼉而有力

天子所以心勞敷奠躬履山川者也爾乃御雲母之
舟鼓沙棠之楫淮陰江北錦分天漢之終蜀井

崑岡秀得名山之始虹梁霞闕鈞天散廣樂之
音璿樹瑤林富媪聚蕃釐之種然後耀長離而
前振駕鳴鶴於中流江淨如迎山浮欲亞

星躔繼照漱玉飛泉

天步重暉歆金上景凌焦跨固招搖御瀛島之風戛
石彈璫空曠洞軒轅之聽魚龍踴躍肅綵仗而
推移日月升恒抱金輪而沐浴遂歷九隴望五
湖金鼎梅梁上繞天潢之舍石樓玉柱下披神

禹之書由是闢地戶而啟天門招支硯而舉鄧
尉劍飛靈沼勸寶籙於帶牛虎變仁山擷金精
於般獸雲烟照曜三江作水鏡之觀草木天條
九曲有春風之扇鳧藻樂矣翠華深矣

皇帝於焉下吳越之名都觀海江之通氣圓竅水立
排六駕而騰裝方丈山飛會三躋而執玉天輪
地軸負大力以夸娥陰火陽水煽長風於條忽
响濡潮上鯢魚怒九萬之搏滲漉瀾平龍伯罷

三千之鈞是以揚靈鯁壑告禹錫以元圭考築
龍堂載堯光於金構然則東來靈鷲深山待虞
舜之游西泛金牛聖水愜周文之思嵐光葩葢
非惟紫鳳一枝湖色春旗自是蒼麟小海葢同
星之並潤異慶之皆行矣由是睠吳會而北旋
遵大江而西顧金陵氣紫控龍虎於八朝天闕
峯青仰

神靈於載見屬車

清問非無顓頊之邱松桷低徊更上成湯之寢是知
珍奇臺館不加棟牖之心佳麗江山自製盤盂
之戒

天子方盡力乎溝洫所無逸於康田也乃度鳳舸於
江淮移鸞旗於彭楚呂梁懸水靜白石之雙洪
蘇守長堤壓黃樓於五勝容刀舟玉不辭陟降
之勞浮磬蠙珠自有平成之績導源雍豫直千
里而澄清演委徐揚亘萬年而底定可謂龍圖

親授不輟堯咨蟻穴周防猶勤湯問者矣是時
天子北瞻魯望穆然大隗之存東面道尊不在廣成
之謂杏花檜紐手愛樹於千春玉璧金絲契聞
韶於三月菖蒲實豆操蘭薦王者之香翡翠圖
尊歌鳳下聖人之世叢著含露揆元德於二知
曲柄留虹晉素王於三接然則玉虬靜吐淵泉
會稱水之心白馬遙明天日曠登山之目坐金
牀而望秩封禪無文探玉策而延洪貞符有道

信乎禋宗格祖禮備於虞書喬嶽翁河烈光乎
般頌矣且夫省方設教大觀也陂澤滌川大業
也勞農勸相以勤民也見聖得師以凝道也况
乎

雲章萬卷辭源摘天稷之星

睿筆千花藻想趣勾芒之令山靈抱簡搜月窟而毫
空水伯懷銘喘天吳而墨湧農皇攬穗深知稼
穡之艱唐帝游河自寫神人之暢卿雲五色進

八伯而難賡神鳳九苞詔羣言而莫和而猶千
篇奏御文章空牛女之分羣雅趨風羅畢盡鴛
鴦之網天人符矣禮樂作焉非天下之至文其
孰能與於此然而

天子星朝命駕求民瘼於三時乙夜披章通神謨於
萬里條狼輯御無擾於外郊腰褭班金悉供於
內府思深瘠土如聞後已之聲手拂薰風莫解
先憂之意所以鑒民而提金鏡觀我而啟丹書

非天下之至明其孰能與於此由是蠲租幸地
所過有差賜復今年其前勿稅瀕河郡縣久仰
給於大官加澤淮徐俾偕遊於樂土下文宣之
詔不啻如綸喻堯舜之心自然挾纊止車蔭德
登仁壽於八千解網呼蜚空句園之十五而且
碧環拜命六鳴回萋華之春朱紱升階四子講
中和之德三瑋前馬明禪徧於羣神六豆從游
日秩優乎國老有生皆樂無瑞不轅非天下之

至仁其孰能與於此然而

皇帝詰戎兵於妣跡張營衛於雲師排山陳貔虎之
軍照水試龍犀之氣辰旗不動息萬籟於清空
鼙鼓同聲拊六鼇於俄頃黃牙樹景雲罕迴蟠
蜺之文青雀乘風組練校芙蓉之鏐吳戈三萬
耀荼火於重輪越甲六千截蛟鴻於十步援枹
風競厲闐闐之八門撫鐸霞收淨琉璃之萬頃
所以陣成蛇嶽環匡衛於天中版入龍堆懾威

稜於海外非天下之至武其孰能與於此而

天子方且奉

慈宮而錫類侍

安輦而觀頤霜鮮翠蔽八珍搖蕙蒲之風雪萼丹禽
五采助斑衣之色江山靈氣想上壽於瑤池童
叟歡心欲同聲於崧嶽所以玉雞振羽詔萬戶
而知晨錦女揚輝照三吳而不夜因天準海元
氣爲舟醉德食和醴泉無量是則

聖人之孝天下莫加者也故知雅頌之興盛於四巡
之日球鏞之韻諧於五載之期臣志則葵傾誠
逾芹獻龍鸞聲遠莫隨捧轂之塵日月光中竊
有捫槃之慶生當明備識典禮之三千職在文
章抒見聞於萬一

堯功禹德喻天地而難名海廣山高象蟲魚而莫罄
謹獻頌曰

龍飛用九斗建惟三天樞直北

帝軒指南六羽張蓋五山蓋簪圓燾方載雲油雨甘
一章

我

祖六駕我

皇珂省麟鳳名州星辰抱景水涿

天光山延

睿幸金鑊傾聲黃雲引領 二章

鼎精扶杖襄童迎馬龍色如春鸞歌聽夏

璇輦瞰扶翠旗雲下時雨時暘如魚如雅

三章

絳宿禮辛赤文侯甲河伯授書淮靈在桺桃水鏡流

瓠宮雲雷鼇鍍金隄龍銜玉押

四章

渡淮而南厥州惟揚江紆珠折山分玉岡綠華夜月

紅藥朝陽堯心松在軒思雲將

五章

錦江遠下玉山中浮潏蒼一色浴日萬漚水心相貝

空外闐球

龍光舊觀鳳棹新謳

六章

三山風和五湖星潏鯢角城低颺精氣上海英六飛

天葩十丈鶴蓋摩劓龍芝香益

七章

日母溯平月妃汐靜星正於衡海圓如鏡翠巘空濛
金泐明靚迴地留雲迴川媚

聖

八章

越氣龍旋吳都虎伏山川金粉城郭膏沐精茂殷虛

青松夏屋

睿精鑒水道隆授木

九章

溯淮之陽莫河之源攢攢敷土碑琫在原疇咨鴻澤
偕樂鳧暨收銘禹鼎衢醉堯樽 十章

大功巍矣至德皐然麟封馬鬣玉聲朱紱日光上岱
天心在川德符三謁功高五嶺 十一章

天文彪列

睿思鴻綱十二雕龍三千吐鳳火房葩正黃宮律中
賡謝夔臯儼窮游貢 十二章

珠旒視遠玉璫聽卑觀我自出牖民如篋問所疾苦

思猶溺饑殍機邇察堯象周知

十三章

賜粟如京免供惟正赤帝行德蒼龍布慶鼓淵鷺飛
旗招鷺映人樂絳年

天申媽命

十四章

帝簡七萃春張六軍列缺鞭水馮螭鼓雲日月帆合
鸛鷺陣分萬里耀德八風同文

十五章

兩儀惟孝四極大和敬至圭鬯愛深義娥

玉顏愉婉甘醴旨多禮徵特告詩遂鳳歌

十六章

平定準噶爾頌

謹序

陳兆崙

準噶爾在元時爲別部瓦剌之後其先世額參
及子託渾竄處西北分爲四部卽杜爾伯特北
厄魯特諸屬是也世以強力讐服其衆及其旁
近小弱并兼而役屬焉用是日久坐大號爲雄
酋儼然與古匈奴單于等我

祖

宗舊跡東海奄有中夏黃鉞所臨威德並耀緣邊四

十九部回面內向悉爲臣僕而準噶爾獨恃其
險遠倔强窮海之間抗不奉

天朝正朔自

國初已然至噶爾丹貪而好兵往往抄畧我蕃部
如哈密喀爾喀等歲無寧居

聖祖仁皇帝赫然震怒三駕親征雖已長鯨暴腮歸
骨武庫妻孥係虜相屬於

闕庭而

聖祖如天之仁特予矜宥且錫之冠帶以風示之孽
豎怙惡不悛不可化誨竟自屏封賞之外又數
十年

世宗憲皇帝大興六師務究前緒於是有青海之功
然卒以勢阻幽遐地便逸賊徐議休息以待其
時益自噶爾丹以至策妄負嵎梗化倏然自若
幾閱百年此固由我

聖祖

世宗以堯舜之用心懲漢唐之窮黷不忍敝關內以
事邊功而亦惡木能固其根本桀犬各忠於所
主勢有固然理不可得而奪也

聖上卽位之十有五六年間緬甸自南至重洋自東
至四遠無名之國奉表受吏者日至而未有已
而乾隆甲戌之歲準噶爾所部車楞伍巴什等
率其屬戶及牛羊馬駝萬數款關以來

天子曰吁是篡弑相尋者非一世矣達瓦齊酷暴尤

甚其不可赦卽曰下

詔受降並策所以分道進師者時天下承平久士大夫率不習兵事兼狃於老生羈縻外夷之陳說意持兩端惶然內疑又竊獨自深念謂向者西師之撤實自

聖意決之今茲決策顧與昔異是必洞鏡乎天人之際有萬舉萬當者而此理高遠幽深卒莫能窺

見萬一明年二月西北兩路之師應期而發將

軍臣班第數以捷聞蓋所過準噶爾舊部罔不
崩厥角以迎兼爲前導未幾師壓其境而陣遂
渡伊犁大陳甲仗夷人畏慕無貴賤男婦少長
相率羅拜馬前旋用其降人窮追達瓦齊禽縛
以獻會無亡矢遺鏃之勞而三四月之間廓清
大幕萬里之地如在戶闥豈不奇哉豈不速哉
故知先時而坐照者之謂聖應時而定畫者之
謂賢後時而覺悟者則衆人而已矣雖有元惡

大慙當其數未應絕則優容之及乎既得罪於
天王又自戕其君父兄而

聖人用兵之意決矣此

聖意卽

天心也唯是臣以今日之功稽諸往牒則罕有可比

者自漢以下無論有如虞格三苗夏討觀扈高
宗之伐鬼方周宣之征玁狁寧非千古艷稱抑
亦猶淹日月卽傳記所述好仁之君無敵王者

之師不戰証之其時其事百無一應焉然則從
古儒者侈大之虛談竟成我

聖世顯爍之實事此臣所爲誠懽誠忭至乎不知手

之舞之足之蹈之以爲我

皇上運籌之神一至于此也而

列祖

列宗陟降之靈若啟若翼如此其彰明較著也不揆
禱昧謹製頌十有四章拜手稽首以獻其詞曰

於顯我

皇知臨萬邦允文允武一弛一張大國以下同風軌

道蠢爾荒裔自離於咎

叶

式遏寇虐肅將天討

一章

邊矣西海茫茫外區自昔梗化勞我三驅仰惟

皇祖六飛于征率時

皇考益戎以兵天網則恢時或舍之厥罪貫盈其可

宥之

二章

誕我

后之明寰宇肅清大宛月氏天竺之鄉莫敢不享王
其有不庭罪罔攸貰惟

聖憲天洞達時勢云何內訌往息其熾矧云來告往
救其敝

三章

文恬武嬉濟濟盈庭瞠乎懷疑罔或唱聲

帝斷獨伸是用大介巖巖葱嶺諸蕃來會既來既從
蟻伏膜拜我龍受之俾副虎臣疇非虎臣視此降人
四章

正月初吉我出我師我車嘽嘽我馬騤騤或來自北
或來自西西戎樂只西人綏以不驚而牧不輟而耕
若時兩降藹然祥兵嫖姚載展言觀德旌

五章

涸魴其蘇夾路歡呼蠕蠕之衆筐壺載塗因糧於敵
士卒攸賴苜蓿葡萄供諸塞外遂通西極天馬騰驤
如霆如雷于彼之疆

六章

鋪敦河墳言扼其衝如瓦斯解如土斯崩迺有逋逃
宵奔晝伏俘之以歸執獻其馘貳者勿族降者攸服

誰爲禍階戎首是劾

七章

髡兔伏窟衆競掠之鉦鹿驚曠衆胥攫之天方俾怒
殛此元惡昔也怒臂今迺視魄若網在綱窮獸斯縛
肆其靖之息我埃析

八章

軍中之言露布之竿翔旂習習鉦鼓蕭蕭一月三捷
譬猶日半

叶

伊犁浪息大幕春溫在昔有苗七旬斯

格曾無需時不戰以克蕩蕩萬里孰尸其功僉曰何

功惟

皇之明

叶九章

帝曰卿士凡此外荒孰非我民叶我取其殘式定厥

疆錫土宇版章大圭測景萬物由庚叶之紀之綱西

域攸暨之屏之障四裔以無壘十章

大勲旣集顯號宜崇

聖德謙尊以勤以容寢門晨視

慈母燕喜善則歸

親爰多受祉玉冊煌煌鴻文炳采百福備舉禮樂載

興以莫不增

天壽作朋

十一章

爰筮吉辰告於

天

祖於穆清廟既燕以饗

叶

於樂辟雍萬舞以奏

叶

我

皇大孝繼志述事

叶

執競純禧亦創亦守

叶

溯時丙

子聿周星紀

前聖

後聖其道同揆

十二章

帝下明詔秩秩德音策勲酬庸百辟其刑乃求嶽之
神乃求川之英懷柔震疊既乎遐邇南諧北變東漸
西被聲教率從告厥成功

十三章

王猷允塞四方既來

叶

天子之功四方既同

天子視朝上下泰交祗祗翼翼匪逸匪休

叶

大智若

神惟

聖運之大勇不矜惟

聖定之

小臣

作歌惟億詠之

十四章